



## GRAMATABRUL.

VÖDS KIOMÖDIK!

Vöds kiomödik dabinons in Volapük! Suvo kanoy defomön mödikis de stämäd bal, ab pö jenets somik ai mutoy distidön kuratiko onis, küpön patöfis fomirik e süntagikis. Atos i tefon vödis ko stämäd löpo pegeböl, sevabo elis *möd*, *mödik*, *mödo*, *mödiko*. Subsat: *möd* < sinifon numi gretik e kösömo pagebon kobü subsat votik in genitif, kel malon dinis bundanöl, a.s.: „möd at volapükas binon neletian adjenöfükön diali, keli labobs tiko...”; „mens ävedons glötiks, bi ädalabof mödi soik” (klotas); „äremob mödi vinas Litaliyänik”.

El *mödik* binon ladyek e sinifon, das dins fa subsat tefik pamalöls dabinons ön bundan, a.s.: „labof cilis mödik”; „yegeds mödik dö Volapük epubons in gaseds”.

El *mödiko* binon ladvärb, kel sümon ma siäm ad els *vemo*, *vemöfiko*, suvo, a.s.: „vobön mödiko”, „tävön mödiko”, „löfön mödiko”. Semikna i pägebon in vödemis dasamik pla ladvärb sümik: *mödo*. Ye el *mödo* labon sinifi nedabinotikum e pagebon ad vemükön difüli dista bevü dins pö gebäd pluamafoma u ladvärbas: *nog*, *plu*, a.s.: „etuvom luglofotis nog mödo gretikumis”; „vilons zepön nog pükatribütis mödo plutumis”; „mödo latikumo”; „el ,Dsemsyid’ äbinom mödo jäfedikum ägudikum ka el ,Hom’”; „Atans (foginänans) äkömons mö trups gretik, mödo plu ad logön mani famik, ka ad duspatön niverabukemöpi leigo famiki”; „vapasfer marda binon ye mödo mänsidikum ka ut tala”. ■

### MAGODIL NULIK SOTA: ,MEME’.



**VÖG VOLAPÜKA.**

Daniil Morozov': redakan  
ä vicifal,  
.shido2308@yahoo.com',  
,Ekaterinburg', ,Rossija' / Rusän.

**Jäfidot soga bevünetik Volapükka.**

YELOD 34<sup>id</sup>. NÜM: 8. 2024 GUSTUL. PADS: 65 jü 72.

### O Volapükflens valöpo!

Bü brefüp edupadob gasedi yönädik tiädü „Mulapenäd nebolitik. Volapükagased” (ko donatiäd: „Nogot [jäfidot] flenas valik Volapükka”). Pepübon in ,Wien’ de yel: 1887 jü 1890. Redakans äbinoms söls: dokan: ,Moriz Obhlidal’ e ,Josef Schmidjörg’. Gased at eklülädon labön materis nitedik mödik, ab pato sökod pübotas: „Lifanunods tidanas Volapükka” (ettimo äpenoy eli „...tidelas volapükka”) enitedon obi. Redak gaseda pemäniotöl primo ädesinon ad dabükön lebuki plutoumik, sodas toum alik öninädon-la lifajenädis tum Volapükkitidanäs, ba ma sökaleod geta diplomas de ,Schleyer’. Ye tidans mödikün änademons levüdi at, e fino te peneds ä oklifibepenots aniks äpubons su pads Volapükagaseda et.

Esludob ad pübön dönüamo in gased obsik penedis et manoms nuik püka pemenodölis. Atna kanols reidön lautoti fa ,Henriette Wolter’, dö jikel bo ya sevols bosi. Äsevädof as „ji=Volapükkan famikün tala”. Lezilo äpakof Volapükki jü deadam oka ün 1912. Älanälükof ad gebön Volapükki grupi gümnadanäs in ,Osnabrück’, bevü kelans ciful fütürük Volapükamufa: ,Albert Sleumer’ < ädabinom. Bo sekü atos i kanoy lecedön ofi ji=Volapükani veütikün in jenotem Volapükamufa.

Vipöl oles reidedi nitedik redakan:

*Daniil  
Morozov*

# LIFANUNODS TIDANAS VOLAPÜKA.

**Jiel Henriette Wolter.**

*Jitidan Vpa (10), jimatan kronalavogana: söl: ,Hermann Wolter' in ,Osnabrück', Hanofän.*

Pemotob tü 1821, tobul, 8 in ,Harburg' len ,Elbe'<sup>1</sup>. Famülanem oba bü mat ebinon: ,Wedekind'. Nu vilob penön hitidanes e jitidanes löfikes e lestimikes <Vpa> nunodi oba.

Steifülobasd ad bepenön plakis obas tefü dins Vpa! Peneds obas okipedons jenotemi pükä ebo ata, kel pedatuvon fa söl danolik: ,Johann Martin Schleyer'. Bepenobsöd jenotis valik, ad stimön mani at, kele danädobs fredis vemo mödikis sekü datuv gretik oma! Te söl: ,Schleyer' balik ebinom tidan letälenik oba! Elabob ni vödabuki, ni gramati. Pianiko vöds anik pükä nulik pebükons in gased almulik oma: „Siunahap” (= Deut. ,Sionsharfe’). Epenob ettimö söl: ,Schleyer' lafo me Volapük, lafo me pük Deutänik. Söl: ,Schleyer' egespikom ai obe, ai jafölo vödis nulik ed ai ejäfom ad tidön sufädiko obi me spodakads ed i me penäd oka: „Siunahap”. Atos ebinon prim studa obik pükä nulik e luveratiko i pro votikans valik, kels ettimö esevons gasedi at. Atos ebinon ün yel: 1879. Ün yel fovik gramat balid epubon. Buk at ägebidükön i vödabuki balid.

Kiogretik fred ebinon! Spodots pegudükumons ed espodob ko vomül: ,Wirsching Angelika’, ed obs bofik esteifobs ad dagetön flenis nulik pro din gudik Volapükä. Ün yel: 1881 epubon yelod balid gase da: „Volapükabled”. Söl: datuvan Volapükä < ecälodom ün muls ba lid balidis tidanis pükä nulik. Ereidobs ettimö nemis sököl: ,Lenze, Bauer (Bánfi), Wirsching, Emmert, Peitz, Ölschig, Loos’. Ün setul yela et: ,Domicke, Jakobs, Wolter, Bräunig, Schultes’ ed ün novul dokan: ,Obhlidal’ pecälodons.

Ün yel: 1882, efe ün gustul e setul söl: dokan: ,Obhlidal’ pecälodom as cif<sup>2</sup> balid Volapükä pro Lösterän; fovo pecälodons as cifs pro Vürtän söl: ,Kniele Ruppert’ e pro Nolüda=Deutän ob it. Stük at: Nolüda=Deutän < no ebinon so gretik, äsa seimna idabinon fedatat

nons jonülön güti domaläda. Ilülogölo da fenäts doma etanas mari nenfinik fa granoin pitegöli e daduliko lü horit fagio zugöli, te äkanob stünön, kis üfo ikoedon-la lödon mani danolik at kobü vom jönik at pö top somik.

„Topil bisarik ad topät, vo-li?” äsagom äsif geölo tiki obik. „Ye eplöpobs ad vedükön obis go läbikis, vo-li? o ,Beryl’!”

„Vemo läbikis,” ägesagof, ab tonod süada ädefon pö vöds ofik.

„Älabob juli,” ,Stapleton’ äsagom. „Ätopon pö nolüd läna. Jäf et pro man labü natäl obik äbinon rotik e naütitik, ab privileg ad lifön zänodü yunanef, födon dafomi täläktas etanas, e spiretön etanis me kalad e dials löniks vemo pädigidon fa ob. Too fätots ätadunons obis. Peideim vemik inüdranon ini jul, e kilans hipulas ideadoms. No plu ädönulifikon pos mijenot, e pluamanum katäda obik nesavoviko pifegebon. Ab ye, üf no demoy peri kompenanefa keinik hipulas, fredoböv dö mifät lönik, bi, dub klien vemik obik ad planav e nimav, etuvob is mögis nemriedik tefü bujäfüd oba, e sör obik divodof kol Nat, leigoäs ob. Atos valik, o dokan ,Watson’ ireifon oli dub ol it, efe logodanotod olik, du älülogetol mari da fenät obsik.”

„Tik fe esüikon pö tikäl obik, das atos binon-la boso naütitik, ba läs pro ol, kas pro sör olik.”

„Nö! nö! neai naütob obi,” spidöfo äsagof.

„Labobs bukis, labobs vestigadunikamis obsik, i labobs nilädanis nitedik. Dokan: ,Mortimer’ < binom man nolikün pö jäfüd okik. Siör: ,Charles’ < neläbik id äbinom kosädan legudik. Äsevobs omi vemo gudiko e lügobs demü deadam omik vemikumo, kas kanob notodön atosi. Cedü ol, va tuvemo ovüjäfükoböv-li obi, üf uvisitoböv siöri: ,Henry’ < aposzedelo ad kosükön obi ko om?”

## DOG ELAS ,BASKERVILLES'.

### KAPIT VELID. ELS ,STAPLETONS' DI ,MERRIPIT HOUSE' (7).

„Si! äyagob bali elas ‚Cyclopides’. Binons vemo sele-  
diks e ti neai komädons ün latafluküp. Pid kion! das  
enegetob fanölo oni!” Äspikom nenglifiko, ab logs smalik  
klilik omik nenzediko älogedons vifiliko nu lü vomül, tä-  
no lü ob.

„Äsä logob, esevädükols olis ode”.

„Si! Äspikob siöre: ‚Henry’, das boso elatikom ad loge-  
dön jöni legik maräda.”

„Liö! kim cedü ol binom-li atan?”

„Niludob, das atan mutom binön siör: ‚Henry Basker-  
ville’.”

„Nö! nö!” äsagob. „Binob te komunan pülik, ab flen  
etana. Panemob dokan: ‚Watson’.”

Logodared lusidina äsüikon pö logod notodik ofik.  
„Täno äbespikobs dinis nebaiädik,” äsagof.

„Sio-li? no älabols timi saidik ad spikotön,” blod ofik  
äküpetom labü logs leigoso dasäköls.

„Äspikotob, äsif dokan: ‚Watson’ < äbinomöv belödan  
isik, plas äbinomöv te lotan,” äsagof. „No kanos veütön  
vemo pro om, va binos gölik u latik pro rogids. Ab ulü-  
kömol ad dialogön eli ‚Merripit House’, vo-li?”

Spat nelunik idugon obis lü on: dom marädik glumi-  
dik, seimna farm bridana seimik ün dels yönädik beni-  
köl, ab nu pinätüköl e pivedüköl lödöp nulädik. Fluke-  
pagad äzüon oni, ab bims, äsä kössömo binos pö maräd,  
äbinons emaratiköl e pedämüköl fa klimat isik, e top  
lölik ävobedon, äs ut tämöfik e glumälik. Hidünan bäl-  
dik dasägik bisarik labü gun vorik ä ruilakölik, hikel  
imaifükom obes yani, äjinom lönedön lü dom. Ye nino  
äabinons cems gretik kil so feiniko pimöböls, das äji-

Nolüda=Deutäna<sup>3</sup>. Ebinob sevädk in Jlesvigän, Holstän, ‚Lübeck’,  
,Hamburg’, ,Bremen’, in Braunvägän, Loldänburgän, Hanofän ed in  
ziläk nilü ,Harz’. Fikulosöv ad dilön stükis ebo etis. Nem et: No-  
lüda=Deutän < ebinon saido suemovik dü tim primik Volapüka, ibä  
ebinob ettimo jitidan balik in stük lölik.

Sosus söl: datuvan Volapüka < ecälodom obi asä jicifi pro  
Nolüda=Deutän, edutävob stuki oba ed evisitob in ,Harburg’, ,Ham-  
burg’ e r. lädis ed i sölis, kels ettimo elebonedons gasedis Volapükik.  
Sis täv at oba num tidanas in stük oba emödikumon. Ons it olautons  
nunodis oksik, ye ob finükob nunodi oba ko vip: Söl: datuvan Volapü-  
ka lifomös! e Volapük löfik obas lifonös! e glofonös!

1888.

#### KÜPETS REDAKA.

<sup>1</sup> Nu el Harburg: dil zifa: ,Hamburg’.

<sup>2</sup> Änemoy ettimo as cif presidani Volapükakluba u Volapükaklubas valik  
läna, reigäna, ... Cifal pälecedon „cif cifas” somik, kludo titul at egeton  
poyümoti: =al.

<sup>3</sup> Ba el Norddeutscher Bund.

#### SMILOBSÖS MA MODS TUMYELAS DIFIK!

Konotül ma Vp. evönädiköl.

Konotül ma Vp. nutimik.

Mikapälüb.

Fa ,Rupert Kniele’ (Deutän).

Cödel: ,Also-li koefons tifi lä tedel  
Leman?’ Pekusadel: ,Si.’ ,Leman?’” Kusadäb: „Si!”

Cödel: ,Li-äbinons domadünel  
us?’ Pekusadel: ,Si.’

Cödel (dikom plotogele): ,Ebinob  
domadünel lä Leman tedel.’

Pekusadel: ,Li-ons i? Vo leno  
enolob atosi.’

Cödal: „Kluö! koefol-li tifi lä tedan:  
Kusadäb: „Si!”

Cödal: „Äbinol-li domadünan us?”  
Kusadäb: „Si!”

Cödal (dikom protokane): „Äbinob  
domadünan lä ,Leman’: tedan.”

Kusadäb: „Ol i-li? Vö! leno äsevob  
atosi.”

#### KONOTÜL NUTIMIK.

Luman semik nügolom ini pötek e sagom: „Givolöd obe pilulis ta  
dalabiäl. Zuo ön mödot mögikuno mödik!”

## Tellögans\* tala.

Tiäd rigik: „Die Zweifüßler der Erde“; kapit se „Der kosmische Weg der Menschheit im Wassermann-Zeitalter“ („Veg levalik menefa ün timäd sivatana“) fa „K. O. Schmidt“, 1971; ini Volapük petradutöl fa „Hermann Philipp“.

Pö senidam in valod tikodabranas\*, notets anik fädiko päfanädons se „Nunod: 103 < fa dabinani=datuvülan\* cifik: „Sigma 83“ in vestiga=stelanaaf\*: „Sir 9132““:

„Nunod: 10 dö „Sol 3“, keli planetans\* it nemons eli „tal“, e dö lifafom\* dareigik: tellögans\* loxini natemöls < paläfulükon somo:

Tikakosäds\* dönuamik fümükons madagredäti\* jünu pedatuvüloli: 7 < volfagedakeda\* mäldegdilik.

Num bidas – dilo su glun ed in vat lifolas, dilo livamufovikkas\* – binon vemikum mö naät degik kas penunos in nunod: 19.

Säk no nog peklülon, viomafädo lifadul pülik onas taedon u gönön volfi atas.

Nebaiäd\* klatik dabinon: Ifi dabinakomip pö lifafoms donikum nog nomon, blebos neplänovik, kikodo uts löpik „menas“ sonemik nog blibons pö gred at, e kikodo bekomipons odis balatiko e kobädko igo jü krigam planetik, plas vifükumön volfi okas dub koboyumikam.

Too vif volfa onas binon vemik – pö steif lanöfik tanamü nefümöf\* lanik e klien ad mekädam. Atos ba pakodon dub nulüd, bi mens nog kosididons okis medü deid e nüsum lifafomas donikum, leigoässä dunons dabinans balugikum.

Jinos, das no nog pasevons nämetiks laibinükam e cen kopafoma.

Lanibepenöm\* jonädon mikosädi\* ai vemiköli dub nenpüdiäl dibätik menas.

Fäkabepenam\* jonon mödadilo redi. Grün as mal kliena ad balbin tikälik e baläl dabinon te pö jenets nemödik, sis brefüp ye suvikumo, kelos mögükön küipi bönik.

Nog binos nefümik, va riskäd oknosükama dub migeb kereda=nämeta\* sekü nemad tikäla poviton dü loveikam atimik de kulivagred büokeredafüsüdik\* jü volfastad levalik\*.

Bümals gudik dabinons, bi kulivi=maföm\* jonon – näi niväts vemo püliks – mafotis mu vemikis kodü letälenans balatik.

Nesev lifastabas binon stünüköl: Leigogü fägs votik nämets täläktik e lanöfiks nog edaglofons nemödo. Vobeds mufükamanämetik\* tika e vila diseiniseviks\* pejäfidükons fa dabinans balatik\* te nemödiks.

Tikamod levalik pö ons binon sevädk te püliko. Bai atos tikamagots, kelis mens senöfik labons dö vestiga=stelanafs obsik – kelis nemons elis „UFOs“ (= flitadins no pedientifüköls) – binons nesaïdiks.

Klud: Atimo nog defons balbin e mad planetiks bai gredät: 8, pro kel ye bümals gudik dabinons.

Jünu te balatans nemödik erivons madi levalik gredäta: 10 e plu ka 10.

Küpoy diseinätiis stümbabik äsä fägi ad löfön, ad viktimön oki pro zeils lanöfik, e laidäli steifa ad jenöfikön e plu nendöfikön, kelis i gereafs no säkuradükons.

Stips pro lasumov fütürük ini kobäd galaxidik pebalölikas lananas levalik dabinons.

Prüdö! Nunod pafinükon, bi parat jonon kelilami\* mena bosilo fägika tefü tikodi=loveükam\*. ■

## Vöds anik in vödem at pegeböls:

**büokeredafüsüdik** – prä-atomar,  
pre-atomic;

**dabinan balatik** – Einzelwesen,  
individual;

**dabinani=datuvülan** – Wesensermittler,  
investigator of beings;

**diseinisevik** – zielbewußt, targeted;  
**fäkabepenam** – Emotiogramm,  
emotiogram;

**kelilam** – das Mithören, eavesdropping;  
**keredanämet** – Kernenergie, nuclear  
energy;

**kulivi=maföm** – Kulturmesser, culture  
meter;

**lanibepenöm** – Psychograph, psycho-  
graph;

**lifafom** – Lebensform, life form;  
**livamufovikkas** – frei beweglich, free-moving;  
**mada=gredät** – Reifestufe, maturity level;

**mikosäid** – Gespanntheit, tense relation-  
ship;

**mufükamanämetik** – kinetisch, kinetic;  
**nebaiäd** – Widerspruch, contradiction;

**nefümöf** – Instabilität, instability;  
**planetan(s)** – Planetarier, planetarian(s);

**tellogan(s)** – Zweifüßler, biped(s);  
**tikakosäid** – Geisteskontakt, mental  
contact.;

**tikodi=loveükam** – Gedankenübertragung,  
telepathy;

**valod tikoda;branas** – Gedankenwellen-  
meer, sea of thought waves;

**vestiga=stelanaaf** – Forschungsraumschiff,  
research spaceship;

**volfastad** – Evolutionsstand, state of  
evolution;

**volfa=gredaked** – Evolutionsskala,  
evolutionary scale.